

ANCJE LA CRITICHE E JÈ UN ATI DI AFIET PE CJARGNE

Cjarissin pre Toni,

i cj scrîf par furlan coma ch'i sei bon. No sai doprâ nè il Pirona nè Faggin e nancje no sai ce ch'al ûl di spietâ Lamuela. Cjâpimi coma ch'i sei: un cjargnel, dût, ma tacât coma una radîs di arbul in tal cret da so mont. La mê a è una letara personâl, coma ch'in vevi scritas tantas e mai mandadas; forsît par chê pòura che nô cjargnei "vêrs" i vin in tai confronz di chei ch'a i san doprâ la peraula e la pena plui di nô. Coma cjargnel, i ài sintût il problema da mê cjera e da mê int. Lu ài sintût coma om e coma preidi.

Coma om, parceche la mê int, da gno pari as mê sùrs a gno fradi ai son lâz pal mont îr, coma preidi, encja se plevan di Tumieç, parceche i stoi viodint e patint la muart da mê int. Allora al è nassût il desideri di di a fuart a duc', che la nosta int a no à di murî. Al è nassût un document, cun int che, tal pos sigurâ, a no veva nissuna radîs, nè democristiana nè cuintri la democrazia. Il document al è vignût fûr in ta canonica di Tumieç. Al veva, denant - trat, l'aprovazion dai vicjaris foranis e chel dai conseis pastorâls. Al è stât parturît cun onestât, e cun tanc' limiz, ma soledut cu la dibisugna di berlâ la passion par una cjera.

I ài let dut ce che tu ài scrit su "La Patrie dal Friûl": ce che tu dîs tu e ce ch'a disin i predis (cinc) sul document.

Tu mi permetarâs cualchi osservazion.

Il document a nol è stât fat dai democristians, ne dai pulitics intindûz coma tâi. A era int di buina volontât di fâ alc di ben pa Cjargna. Ch'al seti nassût cun tanc' limiz, al dîs forsît che coma oms a no erin i plui adaz a fâ chel document, ma tu mi permetarâs di dîcj che il profeta al pò di robas justas encja s'al è una "gràmula di mus" e no il Gjeremia o l'Isaia da istituzion.

Che voâtis i vebis scrit, che tanc' âtis a lu vebin fat su gjornâi o pa television, che i predis da Vâl dal Natison a vebin dada la lôr adesion, anzît a cirin di fâ alc di miôr, al dîs amancul che alc si à mot. Dopo a vegnin las cussiderazions dai predis. A domanda numar doi, j cjati rispuindût di duc' ch'a "era ora". E allora, pre Toni, no cj pàrial che amancul alc al è stât fat? Che cualchidun ben o mâl, ma sinpri cun cussienza, al à cerût di di a cui di dovê che la Cjargna a va mâl!

Forsît no lu vin fat secont la categorias di cualchedun, ma cert che lu vin fat cun passion.

A resta la cuistion da int. A samea che la int a no seti stada interessada. Alc di vêr al è, ma pos sigura che duc' i vicjariâz foranis a savevin ch'a si stava lavorant in merit; i predis a si son cjatâz a Tumieç, mi pâr in novenbar, e ur è stât det cemût che il lavôr al lava indevant. Un limit al è stât, chel dal timp, o forsît chel di presentâ un document e no una glagn ("bozza") di document.

Chest al è vêr, ma pos dî che l'intenzion a era chê di no vegni fûr coma vôs ch'a faseva revoc (eco) a ce ch'a disevin âtis, ma di di alc di nosti. Se no vin rivât a ce ch'i volevin, pazienza; ma no mi pâr che a si podi dî che si à lavorât dut par dibant.

I ringrazi i predis ch'a son intervignûz in ta tô inchiesta. Soredut i ringrazi pre 'Sef Cjargnel par robas profundas ch'al à detas. Forsi insiema no

rivìn a dîlas, ma cussì fasint, il document al diventa inpuartant plui par chel ch'a disin chei âtis che no par chel ch'a àn det chei ch'a àn fat il document.

Basta cjacarà di chesta Cjargna.

Al sares tant âti di dî. Tu às doma di savê che a mi no mi intaressa la politica dai partîz, ma doma la storia e la vita da mê int.

Cun stima i ci saludi. I sai che tu sês mieç o tre cuarz cjargnel. E alora dopra encja tu, e miôr di nô, la tô pena par chesta biada cjera.

Mandi.

pre Franco Puntel

O soi unevore content de tô letare: sclete, umane e positive. A partis di un, predi e onp, che se ancje no le pense in dut come che le pensìn nô, al à volût sclarî il so pont di viste, al à rivât a viodi ancje te critiche al document un at di amôr e al domande une man pe Cjargne. Si puèdial no dâje, savint che, s'a mûr la Cjargne, al mûr il Friûl?

Lis riservis ch'ò vin fatis sul document pe Cjargne no erin par dî che no si veve di dî. O volevin dome dî che si veve e si à di dî di plui, cun plui clarece, cun plui concretece, cjapant dentri di plui la int chê biade int che j à tocjât di bati dutis lis stradis dal mont par un toc di pan; chê "Carnia Fidelis" che à savût restâ fedele a di chei valôrs umans e cristians che di âtris bandis ju àn dâz vie par sglonfâ la panse o il tacuin. La Cjargne a merete plui atenzion, plui agrât, plui pês. No dome cuanche al è di votâ, ma ancje cuanche al è di fâ. E la Glesie e à di vé un coragjo e une professie sô, cence pore di concurincis, savint che e à une sô sperance di puartâj 'e nestre int di mont. E no "parceche la Cjargne j servis al Friûl", come ch'al dîs il sindic Piutti, ma parceche la Glesie e servis cun plui grazie chei che, cui onps, e àn mancul furtune e udiense.

Maj, 1987

Antoni Beline